

父子合集經

父子合集經卷第十六

西天譯經三藏朝散大夫試鴻臚卿宣梵大師賜紫沙門臣日稱等奉

詔譯

六界差別品第二十六之一

爾時淨飯王并諸營從眷屬等見諸阿脩羅王
乃至外道婆羅門蒙佛授記發希有心歎未曾
有世尊言音美妙清徹一切世間聞者忻悅時
淨飯王始見如來以愛戀故情意慙懃爾時世
尊知彼父王心之所念而告之曰大王我所說
法初中後善其義巧妙清淨一相梵行圓滿今
正說者所謂分別六界差別分位法門王當諦

聽善思念之時淨飯王卽白佛言善哉世尊願樂欲聞爲我宣說憶持信受佛言大王如是六界六觸處十八意所伺察是補嚕沙爲緣得生云何六界所謂地界水界火界風界空界識界云何六觸處謂眼觸處而見於色若耳觸處得聞其聲若鼻觸處能嗅於香若舌觸處悉嘗於味若身觸處親覺其觸若意觸處則知於法云何十八意所伺察謂眼見色已若生適悅若生憂惱若住於捨如是六根各各緣彼適悅等三是名十八意所伺察大王云何爲內地界謂於

內身所生硬澀髮毛爪齒皮肉筋骨若內地界
不生亦無有滅剛無集行大王若時女人而於
內心如所思惟彼補嚕沙彼補嚕沙亦生愛樂
由二和合羯邏藍生又復思惟相似和合而得
生者無有是處若二女人無有是處二補嚕沙
亦無是處若彼彼思惟而得生者亦無是處自
體無實非相應故云何說此爲堅硬性大王此
堅性相似而立畢竟此身潰爛散滅唯塚壙中
是所歸趣彼堅硬性從何所來亦非四方上下
而去大王此內地界應如是知

大王云何外地界堅硬性者如彼世間初建梵
王所居宮殿大寶所成復生他化自在諸天所
居宮殿皆七寶成大王若無地界彼堅硬性從
何所生復成大地厚八萬四千踰繕那縱廣六
萬踰繕那復生輪圍大輪圍山堅固安住同一
金剛復生蘇彌盧山庾健陀山顙泯陀山伊舍
陀山乃至黑山如是三千大千世界次第成已
堅固安住若無地界彼堅硬性何所來大王又
此地界欲壞滅時或爲火焚或爲水漂或爲風
吹譬如酥油其焰熾盛乃至灰燼不復可見若

爲水漂猶如以鹽投於水中須臾消散若爲毘
嵐猛風所吹彼時三千大千世界悉皆散壞淨
盡無餘大王此外地界生時本空滅時亦空自
性空故無有男相亦無女相但唯言說之所顯
示如是地界與地界性皆不可得唯佛正慧而
能了知

大王云何內水界謂此身內所有執受濕潤等
性涎唾脂髓膿血便利爲內水界大王若時忽
見親愛人等眼中流淚或爲苦惱所逼流淚或
聞深法信重流淚或爲寒風所吹流淚如是水

界從何所來水相乾時復何所去乃至此界壞
時興大黑雲三十二重遍覆三千大千世界降
霆洪雨點大如象晝夜傾注相續不絕如是時
分經五十劫其水積滿上至梵世大王此外水
界從何所來又此世界將欲壞時有二日出二
日出已小河泉流悉皆枯涸三日出時無熱惱
池所出四河亦皆乾竭四日出時大海水減一
踰繕那或二或三漸次減至十踰繕那或二十
踰繕那次第枯竭至八十踰繕那有餘水在或
深至一多羅樹或深至胸臆或深至牛跡乃至

少水如指面量當爾之時大海水中悉皆乾燥
淨盡無餘大王此水界相生無所來滅無所去
生時本空滅時亦空自性空故無有男相亦無
女相但唯言說之所顯示如是水界與水界性
皆不可得唯佛正智而能了知

大王云何身內火界若此身中所有執受溫煖
蒸熱咀嚼飲食成熟變壞便令安和入熱數者
名爲火界云何外火界謂不執受溫熱相生若
復有人於曠野中尋求火緣或以蒿艾或牛糞
屑或兜羅綿引火生已或燒草木山林聚落及

餘方處皆爲所燒大王此火界性生無所來滅
無所去生時本空滅時亦空自性空故但唯言
說之所顯示如是火界與火界性皆不可得唯
佛正智而能了知

大王云何身內風界輕動等相謂此內風或時
上行或時下行或住腹間或脇或背或發癰胗
或聚成塊或如刀裂或如針刺出入息等遍滿
身支云何外風界謂若此風從四方來或狂暴
起摧折樹木墮裂山峯若微細起飄舉身衣動
多羅樹名外風界大王此風界相生無所來滅

無所去生時本空滅時亦空自性空故無有男
相亦無女相但唯言說之所顯示如是風界與
風界性皆不可得唯佛正智而能了知
大王云何內空界若此身內皮肉血等顯現增
長離質礙性謂若眼竅耳穴面門咽喉嚙嗽飲
食所引滋味於腸胃間通徹而出若時業緣引
生六處諸處生已圍遶空界此說名入內空界
數然彼空界從何所來又若方處外所顯現離
質礙性名外空界大王若色變壞一切皆空所
以者何是虛空界本無盡故安靜不動猶如涅

槃遍一切處無有障礙大王譬如有人於彼高原穿鑿池井於意云何是池井中所有空相從何所來王曰無所從來佛言大王設使彼人復填以土於意云何空何所去王曰空無所去所以者何是虛空界無去來故不住男相亦非女相大王外虛空界本來無動自性離故但唯言說之所顯示除佛正慧而能了知

大王云何識界謂若眼根爲主緣彼形色及彼表色名眼識界若餘五根緣於自境各別建立名五識界又此識界不著於根不住於境非內

非外及二中間然此識界各各了別彼彼境已
卽便滅謝生無所來滅無所去大王識生時空
滅時亦空自性離故不住男相亦非女相但唯
言說之所顯示如是識界與識界性皆不可得
如佛正慧而能了知

大王云何眼處謂四大種地界水界火界風界
所造淨色若地界清淨則眼處清淨若水火風
界清淨則眼處清淨何以故由地界清淨眼處
得生是中無有少法可得如是乃至風界清淨
眼處得生是中無有少法可得何以故無主宰

故無造作故猶如涅槃自性清淨大王如是眼處各各尋求皆不可得所以者何地界空故則地界清淨乃至風界空故則風界清淨若諸法自性本空則彼界何有清淨亦無忿諍若淨若諍皆不可得復有何色而可見耶當知眼處畢竟空故自性亦空前際後際皆不可得未來所造亦不可得何以故自性離故若自性無有則無男相亦無女相何有愛樂若生愛樂是魔境界若無愛樂是佛境界何以故若無愛樂則能遠離一切諸法

大王云何耳處謂四大種所造淨色分別行相
如前所說大王諸法解脫決定現前如法界空
不可施設大王諸根各各樂著境界眼緣色時
而生愛樂是故說色爲眼境界又此眼根緣於
色境有三種相見可愛色起於貪想不可愛色
起於瞋想非愛非惡而起捨想如是乃至意著
法處爲意境界若彼意處緣可愛色極生愛樂
爲彼所牽引生貪行不可愛色生於瞋行愛非
愛色起於癡行如是聲等三種攀緣領納等有
准前應說

大王諸根如幻境界如夢譬如有人於夢寐中
與諸姝女共相娛樂大王於意云何彼夢覺已
憶所受樂爲實有不王曰不也佛言大王是人
所夢執以爲實爲智者不不也世尊何以故夢
中姝女畢竟非有何況與之共相娛樂當知是
人憶夢中境徒自疲勞不復可得佛言大王如
是如是愚癡衆生眼見色已心生愛樂復起貪
著爲彼所牽造貪業行身業三種語業四種意
業三種最初造作剎那滅謝是業不依東西南
北四維上下中間而住於死邊際命根滅時自

分業報皆悉現前猶如夢覺念夢中事大王識
爲其主業爲攀緣二種相因初識生起或趣地
獄或墮傍生琰摩羅界及阿修羅若人若天初
識生已各受其報同分心品相續隨轉最後識
滅各爲死蘊最初識起名爲生蘊大王無有少
法從於此世得至他世所以者何性生滅故大
王身識生時無所從來滅無所去彼業生時無
所從來滅無所去初識生時無所從來滅無所
去何以故自性離故如是了知身識身識空自
業自業空初識初識空若滅滅空若生生空了

知業轉無有作者亦無受者但唯名相分別顯示

大王譬若有人於睡夢中與諸冤對共相鬪戰於意云何是人覺已憶念夢中鬪戰等事爲實有不王曰不也佛言大王是人所夢執以爲實爲智者不王曰不也世尊何以故夢中畢竟無有冤對何況與之共相鬪戰當知是人徒自憂惱都無有實佛言大王如是如是愚癡異生眼見惡色卽生於惱厭離破壞毀咎怪失造瞋業行身業三種語業四種意業三種最初造作刹

那滅謝是業不依東西南北四維上下中間而
住於死邊際命根滅時自分業報皆悉現前猶
如夢覺念夢中事大王識爲其主業爲攀緣二
種相因初識生起或趣地獄或墮傍生琰摩羅
界及阿脩羅若人若天初識生已各受其報同
分心品相續隨轉最後識滅名爲死蘊最初識
起名爲生蘊大生無有少法從於此世得至他
世所以者何性生滅故大生身識生時無所從
來滅無所去彼業生時無所從來滅無所去初
識生時無所從來滅無所去何以故自性離故

如是了知身識身識空自業自業空初識初識
空若滅滅空若生生空了知業轉無有作者亦
無受者但唯名相分別顯示

大生譬如有人於睡夢中爲畢舍遮之所燒害
心生怖畏癡迷悶絕大王於意云何是人覺已
憶念夢中爲鬼所燒爲實爾不王曰不也佛言
大王是人所夢執以爲實是智者不王曰不也
世尊何以故夢中畢竟無鬼所惱何更說有癡
迷悶絕當知是人徒是疲勞都無有實佛言大
王如是如是愚夫異生眼見是色迷惑不了造

癡業行身業三種語業四種意業三種最初造
作刹那滅謝是業滅已不似東方南西北方四
維上下中間而住最復邊際命根滅時自分業
報皆悉現前猶如夢覺念夢中事大王識爲其
主業爲攀緣二種相因初識生起或趣地獄或
墮傍生琰摩羅界及阿脩羅若人若天初識生
已各受其報同分心品相續隨轉最後識滅名
爲死蘊最初識起名爲生蘊大王無有少法從
於此世得至他世所以者何性生滅故大生身
識生時無所從來滅無所去彼業生時無所從

來滅無所去初識生時無所從來滅無所去何以故自性離故如是了知身識身識空自業自業空初識初識空若滅滅空若生生空了知轉業無有作者亦無受者但唯名相分別顯示

大王當知諸根如幻境界如夢一切諸法皆悉空寂此名空解脫門空無空相名無相解脫門若無有相卽無願求名無願解脫門如是三法與空共行涅槃先道當如是學

父子合集經卷第十六

父子合集經卷第十七

西天譯經三藏朝散大夫試鴻臚卿宣梵大師賜紫沙門臣日南等奉

詔譯

六界差別品第二十六之二

佛言天王譬如有人於睡夢中聞妙樂聲心生
適悅是人覺已憶念夢中美妙意樂是實有不
王曰不也佛言大王於意云何是人所夢執以
爲實是智者不王曰不也世尊何以故夢中畢
竟無有樂聲何況復有生適悅耶當知是人徒
自疲勞都無有實佛言大王如是如是愚夫異
生聞可意聲起於愛樂而生染著造作惡行身

三語四意業三種作是業已剎那滅謝是業滅
已不依東方南西北方四維上下中間而住最
後邊際命根滅時自分業報皆悉現前猶如夢
中念夢中事大王識爲其主業爲攀緣二種相
因初識生起或趣地獄或墮傍生琰摩羅界及
阿脩羅若人若天初識生已各受其報同分心
品相續隨轉最後識滅名爲死蘊最初識起名
爲生蘊大王無有少法從於此世得至他世所
以者何性生滅故大王身識生時無所從來滅
無所去彼業生時無所從來滅無所去初識生

時無所從來滅無所去何以故自性離故如是
了知身識身識空自業自業空初識初識空若
滅滅空若生生空了知業轉無有作者亦無受
者但唯名相分別顯示

大王耳聞惡聲則生憂惱如人夢中親愛別離
悲號啼哭生大苦惱於意示何是人覺已憶夢
中事是實有不王曰不也佛言大王是人所夢
執以爲實爲智者不王曰不也世尊何以故夢
中親愛畢竟無有何況復有別離事耶當知是
人徒自疲勞都無有實佛言大王如是如是愚

夫異生聞其惡聲則生憂惱起於瞋心造作瞋業所謂身三語四意業三種造彼業已剎那滅謝是業滅已不依東方南西北方四維上下中間而住最後邊際命根滅時自分業報皆悉現前猶如夢覺念夢中事大王識爲其主業爲攀緣二種相因初識生起或趣地獄或墮傍生琰摩羅界及阿脩羅若人若天初識生已各受其報同分心品相續隨轉最後識滅名爲死蘊最初識起名爲生蘊大王無有少法從於此世得至他世所以者何性生滅故大王身識生時無

所從來滅無所去彼業生時無所從來滅無所
去初識生時無所從來滅無所去何以故自性
離故如是了知身識身識空自業自業空初識
初識空若滅滅空若生生空了知業轉無所作
者亦無受者但唯名相分別顯示

大王耳聞捨聲起於捨想如人夢中聞他宣說
不了義句於意云何是人覺已憶念夢中所聽
之聲爲實有不王曰不也佛言大王是人所夢
執以爲實是智者不王曰不也世尊何以故夢
中畢竟無有音聲何況更有不了義句當知是

人徒自疲勞都無有實佛言大王如是如是愚夫異生耳聞捨聲不達義趣輕慢毀訾造作癡業身三語四意三種業最初造作即便滅謝是業滅已不依東方南西北方四維上下中間而住最後邊際命根滅時自分業報皆悉現前猶如夢覺憶夢中聞不了義句大王識爲其主業爲攀緣二種相因初識生起或趣地獄或墮傍生琰摩羅界及阿脩羅若人若天初識生已各受其報同分心品相續隨轉最後識滅名爲死蘊最初識起名爲生蘊大王無有少法從於此

世得至他世所以者何性生滅故大王身識生時無所從來滅無所去彼業生時無所從來滅無所去初識生時無所來滅無所去何以故自性離故如是了知身識身識空自業自業空初識初識空若滅滅空若生生空了知業轉無有作者亦無受者但唯名相分別顯示

大王當知諸根如幻境界如夢一切諸法皆悉空寂此名空解脫門空無空相名無相解脫門若無有相則無願求名無願解脫門如是三法與空共行涅槃先道決定如法界周遍虛空際

於此譬喻當如是知大王譬如有人於夢睡中以旃檀香或多摩羅葉香及餘香等而以塗身於意云何是人覺已憶念夢中所塗之香是實有不王曰不也佛言大王是人所夢執以爲實爲智者不王曰不也世尊何以故夢中畢竟無有諸香何況復有以塗身耶當知是人徒自疲勞都無有實佛言大王如是如是愚夫異生初聞妙香便生愛樂心起染著造如是業身三語四意三種業造彼業已卽便滅謝是業滅已不依四方四維上下中間而住乃至最後識滅自

業現前猶如夢覺念夢中事大王識爲其主業
爲攀緣二種相因初識生起或趣地獄或墮傍
生琰摩羅界及阿脩羅若人若天初識生時各
受其報同分心品相續隨轉最後識滅名爲死
蘊最初識起名爲生蘊大王無有少法從於此
世得至他世所以者何性生滅故大王身識生
時無所從來滅無所去彼業生時無所從來滅
無所去初識生時無所從來滅無所去何以故
自性離故如是了知身識身識空自業自業空
初識初識空若滅滅空若生生空了知業轉無

有作者亦無受者但唯名相分別顯示

大王如人夢中見以死蛇死狗人屍繫己頸上
心生怖畏於意云何是人覺已憶念所見爲實
有不王曰不也佛言大王是人所夢執以爲實
是智者不王曰不也世尊何以故夢中畢竟無
死蛇等便更復有繫之頸耶當知是人徒自疲
勞都無有實佛言大王如是如是愚夫異生見
是臭惡瞋恚毀訾造作是業身三語四意三種
業造是業已刹那滅謝是業不依東西南化四
維上下中間而住最後邊際命根滅時自分業

報皆悉現前猶如夢覺念夢中事大王識爲其
主業爲攀緣二種相因初識生起或趣地獄或
墮傍生琰摩羅果及阿修羅若人若天初識生
已各受其報同分心品相續隨轉最後識滅名
爲死蘊最初識起名爲生蘊大王無有少法從
於此世得至他世所以者何性生滅故大王身
識生時無所從來滅無所去彼業生時無所從
來滅無所去初識生時無所從來滅無所去何
以故自性離故如是了知身識身識空自業自
業空初識初識空若滅滅空若生生空了知業

轉無有作者亦無受者但唯名相分別顯示

大王譬如有人於睡夢中爲彼非人斷其鼻根
於意云何是人覺已憶念夢中鼻根斷壞是實
有不王曰不也佛言大王是人所夢執以爲實
是智者不王曰不也世尊何以故夢中畢竟無
有鼻根何更說有被斷壞耶當知是人徒自疲
勞都無有實佛言大王如是如是愚夫異生見
鼻根壞起恐怖想造作癡業身三語四意三種
業最初造作剎那謝是業滅已不依四方四維
上下中間而住最後邊際命根滅盡自分業報

皆悉現前猶如夢覺念夢中事大王識爲其主
業爲攀緣二種相因初識生起或趣地獄或墮
傍生琰摩羅界及阿修羅若人若天初識生已
各受其報同分心品相續隨轉最後識滅名爲
死蘊最初識起名爲生蘊大王無有少法從於
此世得主他世所以者何性生滅故大王身識
生時無所從來滅無所去彼業生時無所從來
滅無所去初識生時無所從來滅無所去何以
故自性離故如是了知身識身識空自業自業
空初識初識空若滅滅空若生生空了知業轉

無有作者亦無受者但唯名相分別顯示

大王當知諸根如幻境界如夢一切諸法皆悉
空寂此名空解脫門空無空相名無相解脫門
若無有相則無願求名無願解脫門如是三法
與空共行涅槃先道決定如法界周遍虛空際
於此譬喻當如是知

大王譬若有人於睡夢中爲彼饑渴之所逼切
遇諸美饌隨意而食於意云何是人覺已憶念
美饌爲實有不王曰不也佛言大王是人所夢
執以爲實是智者不王曰不也世尊何以故夢

中畢竟無彼美膳況得食耶當知是人徒自疲勞都無有實佛言大王如是如是愚夫異生見美食已心生憂著起於貪行身三語四意三種業最初造作刹那滅謝是業滅已不依東方南西北方四維上下中間而住最後邊際命根滅時自分業報皆悉現前猶如夢覺念夢中事大王識爲其主業爲攀緣二種相因初識生起或趣地獄或墮傍生琰摩羅界及阿修羅若人若天初識生已各受其報同分心品相續隨轉最後識滅名爲死蘊最初識起名爲生蘊大王無

有少法從於此世得至他世所以者何性生滅
故大王身識生時無所從來滅無所去彼業生
時無所從來滅無所去初識生時無所從來滅
無所去何以故自性離故如是了知身識身識
空自業自業空初識初識空若滅滅空若生生
空了知業轉無有作者亦無受者但唯名相分
別顯示

大王如人夢中爲饑所逼得其苦瓠并拘賒怛
計子畢租摩哩捺子而便食之心生悲恨於意
云何是人覺已憶其夢中食苦瓠等爲實有不

王曰不也佛言大王是人所夢執以爲實是智者不王曰不也世尊何以故夢中畢竟無苦瓠等況復食耶當知是人徒自疲勞都無有實佛言大王如是如是愚夫異生夢爲饑逼噉其苦味心生恚惱造是業行身三語四意三種行造彼業已卽便滅謝是業滅已不依東方南西北方四維上下中間而住最後邊際命根滅時自分業報皆悉現前猶如夢覺念夢中事大王識爲其主業爲攀緣二種相因初識生起或趣地獄或墮傍生琰摩羅界及阿修羅若人若天初

識生已各受其報同分心品相續隨轉最後識滅名爲死蘊最初識起名爲生蘊大王無有少法從於此世得至他世所以者何性生滅故大王身識生時無所從來滅無所去彼業生時無所從來滅無所去初識生時無所從來滅無所去何以故自性離故如是了知身識身識空自業自業空初識初識空若滅滅空若生生空了知業轉無有作者亦無受者但唯名相分別顯示

大王如人夢中舌根斷壞於意云何是人覺已

憶念夢中是爲實不王曰不也佛言大王是人
所夢執以爲實是智者不王曰不也世尊何以
故夢中畢竟無有舌根況復斷壞當知是人徒
自疲勞都無有實佛言大王如是如是愚夫異
生見舌壞已心生恚惱造是業行身三語四意
三種業造彼業已刹那滅謝是業不依四方四
維上下而住最後邊際命根滅謝自分業報皆
悉現前如夢覺已念夢中事大王識爲其主業
爲攀緣二種相因初識生起或趣地獄或墮傍
生琰摩羅界及阿修羅若人若天初識生已各

受其報同分心品相續隨轉最後識滅名爲死
蘊最初識起名爲生蘊大王無有少法從於此
世得至他世所以者何性生滅故大王身識生
時無所從來滅無所去彼業生時無所從來滅
無所去初識生時無所從來滅無所去何以故
自性離故如是了知身識身識空自業自業空
初識初識空若滅滅空若生生空了知業轉無
有作者亦無受者但唯名相分別顯示

大王當知諸根如幻境界如夢一切諸法皆悉
空寂此名空解脫門空無空相名無相解脫門

若無有相則無願求名無願解脫門如是三法
與空共行涅槃先道決定如法界周遍虛空際
於此譬喻當如是知

父子合集經卷第十七

父子合集經卷第十八

西天譯經三藏朝散大夫試鴻臚卿宣梵大師賜紫沙門臣日稱等奉

詔譯

六界差別品第二十六之三

佛言大王譬若有人於睡夢中與諸寶媛共相執持是人覺已憶念夢中所受妙觸爲實爾不王言不也佛言大王於意云何是人所夢執以爲實是智者不王言不也世尊何以故夢中畢竟無有寶媛况復有彼美妙觸耶當知是人徒自疲勞都無所得佛言大王如是如是愚癡異生寡聞無智於可意觸而生愛樂心生染著造

如是業身業三種語業四種意業三種造作彼業刹那遷謝是業滅已不依東方南西北方四維上下中間而住至命終時見先所作心想中現如彼睡覺憶夢中事最後識滅自業現前大王識爲其主業爲攀緣二種相因初識生起作業受報皆不失壞或趣地獄或墮傍生琰摩羅界及阿脩羅若人若天同分種類相續不絕大王最後識滅名爲死蘊最初識起名爲生蘊大王彼識起時無所從來滅無所至其緣生時無所從來滅無所至彼業生時無所從來滅無所

至大王無有少法從於此世得至他世何以故
自性空故如是了知初識初識空自業自業空
身識身識空若滅滅空若生生空輪迴輪迴空
涅槃涅槃皆自性空無有作者亦無受者但隨
世俗之所顯示非第一義作是說也大王當知
諸根如幻境界如夢一切諸法皆悉空寂此名
空解脫門空無空相名無相解脫門若無相者
則無希求名無願解脫門若能了此三解脫門
與空共行菩提先道廣大如法性究竟如虛空
於此譬喻當如是知

復次大王譬如有人於睡夢中持熱銅鑊以爲衣服而自纏身是人覺已憶念夢中熾然銅鑊觸身苦惱爲實爾不王言不也佛言大王於意云何是人所夢執以爲實是智者不王言不也世尊何以故夢中畢竟無熱銅鑊况復觸身受苦惱耶當知是人徒自疲勞都無有實佛言大王如是如是愚癡寡聞凡夫異生見恐懼事心生嫌惡妄生執著造是惡業身業三種語業四種意業三種造作彼業剎那遷謝是業滅已不依東方南西北方四維上下中間而住至命終

時見昔所心生恐怖如彼睡覺念夢中事最後
識滅自業現前大王識爲其主業爲攀緣二種
相因初識生起作業受果皆不失壞或起地獄
或墮傍生琰摩羅界及阿脩羅若人若天初識
生已各受其報同分心品相續而轉最後識滅
名爲死蘊最初識起名爲生蘊大王彼識起時
無所從來滅無所至彼緣生時無所從來滅無
所至彼業生時無所從來滅無所至大王無有
少法從於此世得至他世何以故自性空故如
是了知初識初識空自業自業空身識身識空

若滅滅空若生生空輪迴輪迴空涅槃涅槃皆
自性空了知業報自性非有無有作者亦無受
者但唯名相分別顯示大王當知諸根如幻境
界如夢一切諸法皆悉空寂此名空解脫門空
無空相名無相解脫門若無相者則無希求名
無願解脫門若能了知三解脫門與空共行菩
提先道廣大如法界究竟如虛空於此譬喻當
如是知

復次大王如人夢中自見其身悉皆散壞不覺
諸觸是人覺已憶念夢中身根散壞而生憂惱

爲實爾不王言不也佛言大王於意云何是人
所夢執以爲實是智者不王曰不也世尊何以
故夢中畢竟無有身根況復散壞當知是人徒
自疲勞都無有實佛言如是如是愚癡寡聞凡
夫異生自見身壞心生執著復起恐怖造是癡
業身業三種語業四種意業三種造作彼業剎
那遷謝是業滅已不依東方南西北方四維上
下中間而住至命終時見先所作心生惶怖如
彼夢覺念夢中事最後識滅自業現前大王識
爲其主業爲攀緣二種相因初識生起作業受

果皆不失壞或趣地獄或隨傍生琰摩羅界及
阿脩羅若人若天初識生已各受其報同分心
品相續隨轉最後識滅名爲死蘊最初識起名
爲生蘊大王初識起時無所從來滅無所至彼
緣生時無所從來滅無所至其業生時無所從
來滅無所至大王無有少法從於此世得至他
世何以故自性空故如是了知初識初識空自
業自業空身識身識空若滅滅空若生生空輪
迴輪迴空涅槃涅槃皆自性空了知業報自性
非有無有作者亦無受者但唯名相分別顯示

大王當知諸根如幻境界如夢一切諸法皆悉
空寂此名空解脫門空無空相名無相解脫門
若無相者則無希求名無願解脫門若能了此
三解脫門與空共行菩提先道廣大如法界究
竟如虛空於此譬喻當如是知復次大王如人
夢中見彼幻師幻作五欲種種欲樂自見其身
爲彼圍繞受諸快樂是人覺已憶念夢中所作
事業爲實爾不王言不也佛言大王於意云何
彼於夢境執以爲實是智者不王言不也世尊
何以故夢中畢竟無彼幻師況復變現五欲等

事當知是人徒自疲勞都無有實佛言大王如是如是愚癡寡聞凡夫異生意著於法心生貪染復起追求轉增癡愛爲彼所牽造如是罪身業三種語業四種意業三種造作彼業刹那遷謝彼業滅已不依東方南西北方四維上下中間而住至命終時見昔所作心想中現自分業報皆悉現前猶如夢覺念夢中事大王識爲其主業爲攀緣二種相因初識生起作業受報皆不失壞或趣地獄或墮傍生琰摩羅界及阿脩羅若人若天初識生已各受其報同分心品相

續隨轉最後識滅名爲死蘊最初識起名爲生
蘊大王身識生時無所從來滅無所至彼緣生
時無所從來滅無所至彼業生時無所從來滅
無所至大王無有少法從於此世得至他世何
以故自性空故如是了知初識初識空自業自
業空身識身識空若滅滅空若生生空輪迴輪
迴空涅槃涅槃皆自性空作業不可得受報不
可得但唯名相分別顯示大王當知諸根如幻
境界如夢一切諸法皆悉空寂此名空解脫門
空無空相名無相解脫門若無相者則無希求

名無願解脫門依此了知三解脫門與空共行
菩提先道廣大如法界究竟如虛空於此譬喻
當如是知復次大王譬如有人於睡夢中爲彼
瀑流漂沒己身及其眷屬受諸惶怖種種苦惱
是人覺已憶念夢中水所漂溺爲實爾不王言
不也佛言大王是人所夢執以爲實是智者不
王言不也世尊何以故夢中畢竟無水所漂況
復有彼惶怖苦惱當知是人徒自疲勞都無有
實佛言大王如是如是愚癡寡聞凡夫異生意
著諸法生憂惱處展轉尋求無對治道以不了

故起諸惡行身業三種語業四種意業三種造
作彼業剎那遷謝是業滅已不依東方南西北
方四維上下中間而住至命終時心生惶怖見
昔所作悉現其前如人夢覺念夢中事大王識
爲其主業爲攀緣二種相因初識生起作業受
果皆不失壞或趣地獄或墮傍生琰摩羅界及
阿脩羅若人若天初識生已各受其報同分心
品相續不絕最後識滅名爲死蘊最初識起名
爲生蘊大王初識生時無所從來滅無所至彼
緣生時無所從來滅無所至彼業生時無所從

來滅無所至大王無有少法從於此世得至他
世何以故自性空故如是了知初識初識空自
業自業空身識身識空若滅滅空若生生空輪
迴輪迴空涅槃涅槃皆自性空無有作者亦無
受者但唯名相分別顯示大王諸根如幻境界
如夢一切諸法皆悉空寂此名空解脫門空無
空相名無相解脫門若無相者則無希求名無
願解脫門若能了此三解脫門與空共行菩提
先道廣大如法界究竟如虛空於此譬喻當如
是知

復次大王譬如有人於睡夢中自見其身飲酒
昏醉不識善法及諸惡行功德過失都不覺知
是人覺已念夢中事爲實爾不王言不也佛言
大王於意云何是人所夢執爲真實是智者不
王言不也世尊何以故夢中畢竟無飲酒者況
昏醉耶當知是人徒自疲勞都無有實佛言大
王如是如是愚癡寡聞凡夫異生意著諸法起
愛染心造是癡業身業三種語業四種意業三
種造作彼業刹那遷謝是業滅已不依東方南
西北方四維上下中間而住至命終時見先所

作自分業報心想中現如人夢覺念夢中事大王識爲其主業爲攀緣二種相因初識生起作業受報皆不失壞或趣地獄或墮傍生琰摩羅界及阿脩羅若人若天各受其報同類心品相續隨轉最後識滅名爲死蘊最初識起名爲生蘊大王身識生時無所從來滅無所至彼緣生時無所從來滅無所至彼業生時無所從來滅無所至大王無有少法從於此世得至他世何以故自性空故如是了知初識初識空自業自業空身識身識空若滅滅空若生生空輪迴輪

迴空涅槃涅槃皆自性空無有作者亦無受者
若業若報皆不可得但唯名相分別顯示大王
諸根如幻境界如夢一切諸法自性空寂此名
空解脫門空無空相名無相解脫門若無相者
則無希求名無願解脫門若能了知三解脫門
與空共行菩提先道廣大如法界究竟如虛空
於此譬喻當如是知

父子合集經卷第十八

父子合集經卷第十九

西天譯經三藏朝散大夫試鴻臚卿宣梵大師賜紫沙門臣日稱等奉

詔譯

淨飯王信解品第二十七

爾時世尊告淨飯王言大王如上所說解脫法門當自繫心正念觀察勇猛精進決定修作過去未來現在諸佛依此得證無上菩提能招世間一切富樂能消世間一切渴愛能伏世間一切我慢能破世間一切邪見能滅有情一切罪惡未登初地凡夫異生皆令證得平等法性如是法要非諸聲聞及辟支佛所行境界唯諸菩

薩之所修作大王應作是念我當云何於人天
中得爲眼目於長夜中得爲照明於愛河中得
爲船筏於險難處得爲導師無依怙者爲作主
宰自得度已復能度他自解脫已令他解脫自
得安隱令他安隱自證涅槃復令他證大王不
應觀彼現在世間所受富樂五欲自在諸根如
幻境界如夢謂於色境香味觸心生貪著無滿
足時大王乃往過去無量俱胝那劫有轉輪王
名無邊稱富貴自在有大威德象馬車乘衆寶
輦輿最勝輪寶無能壞者已曾親近無量諸佛

於彼佛所種多善根隨意所念皆得成就大王
彼無邊稱王忽於一時作是思惟我當自試福
德之力以我福故令四天下所有一切樹木花
果皆得茂盛受用無盡作是念已彼四天下所
有花果而得敷榮大王彼無邊稱王如是思惟
我今更試自善根力令四下一切人民若有
作願隨意無違作是念已彼四天下所有人民
一切希求皆得如意大王彼無邊稱王復更思
惟以我所有善根之力令四天下降注香水作
是念已於四天下普雨香水大王彼無邊稱王

復更思惟以我所有善根力故令四天下普雨
妙花作是念已於四天下降雨種種上妙天花
大王彼無邊稱王復更思惟以我所有善根力
故令四天下雨妙寶衣作是念已於四天下悉
雨寶衣大王彼無邊稱王復更思惟以我所有
善根力故令四天下悉皆雨銀作是念已於四
天下皆得雨銀大王彼無邊稱王復更思惟以
我所有善根力故令四天下降雨黃金作是念
已於四天下皆雨黃金所以者何皆由無邊稱
王於往昔時與諸衆生共修善業之所獲得大

王此閻浮提大地縱廣一萬八千踰繕那量復有六十俱胝諸大城郭中有一城名寶莊嚴縱廣正等十二踰繕那四面平正妙巧成就於其城外有多羅樹七重行列四寶所成金銀琉璃玻胝迦寶裝校嚴飾甚可愛樂彼金樹者其葉花果悉皆是銀彼銀樹者其葉花果悉皆黃金吠琉璃樹其葉花果皆玻胝迦彼玻瓈樹其葉花果悉是琉璃其城七稱寶網寶鈴諸妙珍琦彌覆其上城外復有七重寶塹皆以七寶所共合成一一寶塹深半由旬廣一由旬金沙布底

入功德水澄湛盈滿諸妙音鳥翔集其中優鉢
羅花拘沒那花鉢納摩花芬陀利花普遍開發
周匝階陛四寶合成黃金爲階白銀成陛白銀
爲階黃金成陛琉璃爲階玻瓈成陛玻瓈爲階
琉璃成陛一一階道七寶所成其傍皆植金色
芭蕉復於道首置諸寶座巧妙裝校甚可愛樂
如是富樂種種嚴飾皆是無邊稱王積集廣大
善根福力之獲得又彼寶莊嚴城周匝復有八
萬四千清淨園林一一園中有八大池其池各
廣半踰繕那一一池岸有四階陛四寶所成巧

妙嚴飾入功德水充滿其中衆色蓮花開敷彌
布於其池岸復有諸花阿提目葛多花詹博迦
花嚩始計花蘇曼那花阿輸迦花婆師迦花如
是種種諸妙香花無邊稱王與諸臣民止住園
中共爲遊樂大王彼王宮城高廣嚴好寶多羅
樹行植於上寶網周遍寶鈴和鳴出妙音響如
五樂聲時彼人民賴王德化富樂自在安隱而
住大王彼無邊稱王復於異時如是思惟我今
應往東勝身洲作是念已王領四兵俱乘虛空
卽至其處彼諸小王皆來奉迎各以國土虔誠

致獻王於彼住百千萬歲大王彼無邊稱王復
自思惟我今當往西牛貨洲作是念已領四兵
衆俱乘虛空卽至其所彼諸小王皆來奉迎各
以國土虔誠致獻王於彼住百千萬歲大王彼
無邊稱王復自思惟我今當往北俱盧洲作是
念已領四兵衆俱乘虛空卽至其所彼諸人民
歡喜歸化王於彼住百千萬歲大王彼無邊稱
王復自思惟我昔聞有三十三天住須彌頂我
今當住作是念已卽乘龍象與四兵衆飛騰空
中上須彌頂時無邊稱王問御臣曰汝見須彌

及以大海并四天下其事云何御臣答言我見其相旋轉不定如陶家輪王語御臣汝所見者此龍象王不行未止王復前進問御臣曰見須彌等其相云何御臣答言我今見彼須彌大海皆悉震動王語臣曰今將至于須彌山頂此龍象王小行未止王復前進問御臣曰見須彌等其相云何御臣答言我今見彼須彌大海不動不轉王語臣曰此龍象王今已到彼須彌山頂時無邊稱王及四兵衆到須彌已彼帝釋天主卽時遙見無邊稱王歡喜來迎而作是言善來

大王卽分半座命王而坐時無邊稱王卽就其
座住於天上經無量歲與彼天主分半同治在
彼時久作是思惟可退彼天我獨爲主作是念
已王及兵衆卽時退墮寶莊嚴城寶篋園中時
守園者見是事已告城中人作是唱言今有天
人退沒於此時彼國王名曰作愛聞是說已速
嚴駕馭詣彼園中見如上事怪未曾有卽勅排
備種種香花末香塗香詣彼王所偏袒右肩右
膝著地長跪合掌安慰問訊白彼王言聖天至
此爲當是誰彼卽答曰汝昔曾聞有轉輪王名

無邊稱不作愛王言我聞耆舊說昔有王名無
邊稱威德自在領四天下與四兵衆乘空而上
三十三天汝所聞者豈異人乎則我身是時無
邊稱王從天退已初聞人間飲食氣味不能堪
任猶如酥油沃熱沙中時作愛王見其頓弊不
能止住有何善說我於來世作何宣傳時無邊
稱王語作愛王曰我從昔來富貴自在王四天
下一切所須皆得如意陞忉利天帝釋分座貪
無厭故從天退下如上衆事當如是說作是語
已卽便命終佛言大王往昔無邊稱王者豈異

人乎今我身是是故當知諸根如幻境界如夢
繫心正觀勿生疑惑爾時世尊而說偈言

樂求正法財	淨心常質直	五欲不堅牢
智者當遠離	若於法明了	則厭五欲樂
彼善降其心	能破諸煩惱	由斷煩勞故
不受諸惡道	離彼業道者	爲世所恭敬
離貪欲染污	開示欲過失	心樂利羣生
稱世間最勝	聞五欲過患	速能生厭離
以智淨其心	處世無過上	最勝大丈夫
能滅衆生惡	令離彼貪行	處世無過上

最勝大丈夫 能滅衆生惡 令離彼嗔行
處世無過上 最勝大丈夫 能滅衆生惡
令離彼癡慢 爲清淨智者

爾時世尊說是偈已爲淨飯王復說法要佛言
大王乃往過去無量世時有轉迴王名曰地生
善法治世七寶具足所謂輪寶象寶馬寶珠寶
兵寶女寶主藏臣寶王有太子名曰地天紹繼
父王轉輪王位輔相大臣與王灌頂爲刹帝利
灌頂聖王於十五日月盛滿時澡沐首髮洗浴
身垢著新淨衣以諸花鬘摩尼天冠種種瓔珞

莊嚴其身陞高樓上采女圍繞卽於東方有金輪寶千輻具足轂輞圓滿光明照曜縱廣七肘時地天王睹是事已我昔曾聞耆舊所說若刹帝利受灌頂時有金輪現如前所說當知定作轉輪聖王我今應當自試驗之時地天王卽從座起偏袒右肩右膝著地向輪合掌作如是言此金輪寶當降于地如是禱已依王前住王以妙香上妙衣服用拭輪寶置右掌中而語輪曰我今欲往東勝身洲金輪乘空卽至彼所地天聖王出現之處其地平正布諸寶花以王威力

地皆震動井泉河池枯涸之處入功德水悉皆
盈滿所謂輕清甘滑不濁不臭飲者無厭令腹
無痛一切林木花果敷榮諸枯槁者復得滋茂
王所遊處輪導其前所至國土大小諸王各以
金槃盛滿銀粟或以銀槃盛滿金粟咸來奉迎
安慰問訊善來聖王此土安隱唯願居此治化
人民我等皆當給待左右王卽語曰我今不願
國土珍寶汝等應當隨順教誨遠離殺生及不
與取遠離邪婬亦莫妄語乃至邪見十不善業
汝等應當自住十善亦教他人令住十善孝養

父母承事師長莫作非法修行善行亦勸他人
勤行衆善時地天王與四兵衆從勝身洲過盡
人境漸度大海至牛貨洲及俱盧洲宣王德化
悉降伏已王及輪寶還閣浮提於王宮門依空
而住時四天下變成七寶所有一切三惡道苦
及八難處不善之聲悉皆消滅況復有彼造惡
業者所以者何皆由地天轉輪聖王本願力故
又彼輪寶於虛空中往來旋轉四天下時處處
皆生自然香稻不假種植淨無糠粃又彼輪寶
旋天下時諸劫波樹出天寶衣一切有情受用

如意又彼輪寶旋天下時諸有重病皆得痊愈
唯有三病一者意樂二者段食三者衰老彼諸
衆生壽命千歲設有微苦自然消殄有如是等
無量無邊希有之事俱時出現時地天王忽作
是念我今於此富貴自在頗有餘處而勝此耶
復自思惟我昔曾聞須彌山頂有三十三天快
樂無比今可詣彼與四兵衆卽至彼所時帝釋
天主見地天王自遠而來卽起奉迎善言問訊
分座令坐命王同治時地天王經彼時久欲退
帝釋獨爲天主作是念已王與兵衆墮閻浮提

末土羅城彼地天王久住天宮受上妙樂忽墮
人世不能暫安猶如酥油置熱砂中身心頓弊
無所堪任時地天王而說偈言

王者稱自在	不能斷貪欲	如火益乾薪
是故應遠離	如渴飲鹹水	轉增其渴心
當知著欲者	無厭亦如是	如衆流入海
曾無變足時	當知著欲者	無厭亦如是
如鏡照形容	顯現何曾定	當知著色者
無厭亦如是	如聞空谷響	應答無休息
當知著聲者	無厭亦如是	猶如盛香匳

受薰未嘗足 當知著香者 無厭亦如是
如杓和美饌 均布用無時 當知著味者
無厭亦如是 如風行虛空 轉動曾無定
當知著觸者 無厭亦如是 如夢中飲水
不能蠲渴想 意著諸法者 無厭亦如是
若樂著諸欲 貪火轉熾然 當以淨智水
滅之無有餘

爾時地天轉輪聖王說是偈已尋卽遷謝佛言
大王地天王者豈異人乎我身是也
父子合集經卷第十九

父子合集經卷第二十

西天譯經三藏朝散大夫試鴻臚卿宣梵大師賜紫沙門臣日稱等奉

詔譯

淨飯王信解品第二十七之二

佛言大王我今復說往古世時有轉輪王名曼
達多有大威勢具大福德從彼父王頂上而生
已於先世久修梵行曾值無量百千俱胝那由
他佛於彼佛所植衆德本繼嗣父王灌頂之位
統四天下豪富自在於閻浮提出現治化五欲
娛樂殊勝第一安隱豐饒人民熾盛聚落城邑
雞飛相至大地無有瓦礫荆棘設有山阜多產

金寶園林泉池莊嚴國界所都大城名阿瑜闍
其城東西十二由旬南北修廣各七由旬寶網
寶鈴遍覆其上王多眷屬恭敬圍繞猶如帝釋
妙見大城彼曼達多王造三時殿一名月光當
熱際時王居其中二瑠璃藏於雨際時王居其
中三曰日光終寒際時王居其中若王入彼月
光殿時王與后妃采女眷屬前後圍繞身得清
涼譬如牛頭旃檀之香以塗其身王體安和亦
復如是亦如帝釋與諸天子在廣勝殿受上妙
樂若雨際時王與眷屬入琉璃殿譬如以彼多

摩羅跋□囉香以塗其身王意適悅亦復如是
若寒際時王與眷屬入日光殿如沈水香用塗
其身王體溫暖亦復如是大王彼曼達多王隨
其時節所至宮殿皆生樂觸我出涼風或降香
雨或奏伎樂皆得如意大王彼曼達多王忽自
宮內七日之中雨諸金寶滿七日已王歎希有
清淨福業感報若此王住治化經無量歲時曼
達多王作是思惟我聞西有大牛貨洲作是念
己與四兵衆上陞虛空從閻浮提漸至彼所王
到彼已受用最上飲食資具國土人民安隱豐

樂於王宮內七日雨寶與閻浮提等無有異王
於彼住百千萬歲時曼達多王復更思惟我聞
東有大勝身洲作是念已與四兵衆上陞虛空
從牛貨洲漸至彼所王到彼已受用美妙最上
飲食化治人民安隱豐樂亦於宮內七日雨寶
與牛貨洲等無有異王住於彼經百千歲大王
彼曼達多王復自思惟我聞北有大俱盧洲其
中人民不生分別我我所想今當往彼試驗之
作是念已與四兵衆俱乘虛空從勝身洲卽至
其所王到彼已驗其眷屬乃知實爾受上妙樂

經無量歲大王彼曼達多王復更思惟我曾聞
有三十三天在須彌頂各各安住我今當往躬
自觀之作是念已與四兵衆乘空而往從俱盧
洲卽至其處時彼天主與諸天子集妙法堂論
天中事時帝釋天主見曼達多王自遠而來卽
出迎之作如是言善來大王遠至於此乃分半
座命王同坐曼達多王就彼坐時有十種事勝
彼天主一者壽命二者容儀三者名稱四者快
樂五者自在六者端正七者音聲八者身香九
者食味十者細觸時曼達多王與天主形色受

用悉皆相似唯目瞬動爲其別也而諸天子以此辯知天主人王二種有異佛言大王曼達多王生於人間與其天主形儀一等殊勝福報未曾有也住彼天中經無量歲得爲最勝自在天主於四天下富樂獨尊帝釋分治心猶未足時曼達多王忽於一時而起異意我今自可獨爲天主何須帝釋宜應退之作是念已王與四兵從天而墮於閻浮提阿瑜闍城最勝園中當退沒時王之威光遍閻浮提普皆照曜而能映奪日月光明時彼人民出城遊觀見是事已怪未

曾有卽入城中而唱是言今有天人并四兵衆
從空退墮最勝園中大王爾時城中王及人民
卽辦種種塗香末香歌舞伎樂寶幢幡蓋華鬘
瓔珞嚴身之具速疾詣彼最勝園中大王彼曼
達多王初墮人間地六震動是時人民所有一
切殊勝莊嚴最上妙香各各持至最勝園中用
塗王身而爲供養時曼達多王久受天宮上妙
快樂不能堪任人中資具譬若酥油置熱砂上
中身肢疲頓略無暫安時城中王乃問之曰天
爲是誰而墮於此彼卽告言汝昔曾聞有轉輪

王名曼達多王及人民咸皆答曰曾聞有王名
曼達多有大威德統四天下不離人趣與四兵
衆而能上陞三十三天時退墮天卽告之曰昔
曼達多王者我身是也由無厭故而至于此誰
於福報而止足耶時城中王及諸臣民以偈問
曰

我聞耆舊說	昔有轉輪王	名曰曼達多
具廣大威勢	與四兵眷屬	陞三十三天
教化諸天人	爲說於正法	彼曼達多王
捨天樂受苦	無常力所加	由心無足故

人民皆合掌	頂禮大王足	王遺何善言
未來我當說	時曼達多王	乃語衆人曰
我由著樂苦	從天而墮落	有大威德力
統領四天下	受欲樂無足	從天而墮落
昔於自宮內	七日雨珍寶	受欲樂無足
從天而墮落	彼帝釋天主	分半座同治
惡覺所惱亂	從天而墮落	於欲樂無厭
不信受佛語	破壞自福業	流轉輪迴海
世有大智者	能離欲癡暗	亦能教他人
止足善觀察	若住正思惟	隨順諸善法

破壞輪迴行 及生老死厄 觀觸如熾火
觀受亦復然 如是善了知 則於貪不起
愚人著境界 如聞音樂聲 了根境本空
知法離自性 六處不寂靜 唯遍計分別
若了色等空 則不生貪著 智者善防護
厭怖輪迴苦 慧眼常照明 得離諸過患
佛言大王爾時曼達多王豈異人乎勿作異觀
我身是也由恃威德福力自在貪無厭故而取
終歿是故大王應捨豪富憍慢自在安住淨心
莫生放逸若離放逸利益自他生諸善根住平

等理則能證入眞如法性大王當知若有爲界
若無爲界二種平等非有男相亦非女相亦非
過去現在未來當於此法安住自心決定正觀
勿隨他教大王往昔有王名曰昵彌出現世間
正法治化心常寂靜不生放逸於彼彼處離放
逸行怖彼罪惡故不復作大王彼昵彌王志意
堅固常住歡察三世平等觀彼過去一切諸法
住平等理本離自性現在未來一切諸法離於
自性亦復如是大王彼昵彌王觀三世法平等
平等不生取著復觀世間一切衆生爲四顛倒

之所惑著於不淨中而作淨想於逼迫中而生
樂想於無常中而起常想於無我中而爲我想
時呢彌王卽作是念世間愚夫深可悲愍一切
諸法自性空寂癡妄所覆而不覺知當設方便
以四攝事化諸有情令生信順卽語彼言汝當
了知一切諸法本離自性若法離自性者當知
彼法卽非過去現在未來何以故以一切法自
性空故若法自性空者則不可分別說爲過去
現在未來大王彼呢彌王顯示三世平等法已
是時衆會百千俱胝那由他衆生聞法悟解得

無生法忍爾時三十三天諸天子等集妙法堂
共相議論天眼遙見閻浮提中有昵彌王十善
治化一切人民獲得法利善巧方便饒益衆生
是時帝釋天主在於餘處以淨天耳聞如上說
時彼天主來會中坐問諸天子向說何事彼卽
對曰閻浮提人快得法利有昵彌王深達諸法
善巧方便攝化衆生住顛倒者令離顛倒前所
論者乃此事耳時彼天主諸天子曰此昵彌王
宿植德本具足成就威神之力汝欲見彼昵彌
王不諸天咸曰我等願見是時帝釋卽勅御者

名摩多黎汝當嚴飾千輻寶車并諸營從詣閭
浮提昵彌王所作如是說大王此是帝釋千輻
寶車遣來迎王唯願乘此勿生怖也彼諸天子
願覩聖王御者白言王今陞天有二道往爲從
顛倒衆生道去從不顛倒衆生道去王卽報言
汝可將我於彼二道中間而去時彼御者摩多
黎言隨王敎勅中道而進王復告曰汝可停車
暫憩少時我當觀彼顛倒衆生所住之處時呢
彌王以慈願力於須臾頃令無量衆生各各獲
得寂靜神通遊戲三摩地及無生法忍彼昵彌

王於此少時能成大利所以者何由彼積習不放逸行善巧方便利樂衆生時摩多黎漸次前進復將王至須彌山頂王初遙見林木青茂謂御者曰此中定是不顛倒衆生所住之處御者答曰此林乃是三十三天彼諸天子於妙法堂一心瞻仰欲見大王願勿疑怖當陞此堂時呢彌王容儀和悅身心不動帝釋遙見卽起奉迎善來大王遠屈威神無至疲極乃分半座而奉彼王共相慰問王乃就坐善哉大王快得善利能令佛法熾然增長帝釋乃謂諸天子言此呢

彌王久植善根成就不可思議功德善巧方便
於少時間教化八十俱胝有情離顛倒地安住
佛法彼摩多黎都不覺知時呢彌王爲諸天子
廣說法要白天主言我今當還於閻浮提所以
者何爲欲護持佛正法故天主乃曰願王隨意
佛言大王往昔呢彌王者我身是也不放逸力
不可思議帝釋分座尙無貪著是故當知於佛
法中勤加精進住不放逸大王何謂佛法一切
諸法皆是佛法時淨飯王聞是說已白言世尊
若一切法皆佛法者一切衆生皆應是佛佛言

大王衆生不住顛倒見者卽是佛也大王所言
佛者或名眞如或名實際或名法界但依俗諦
推求詮表非勝義諦作是說也大王一切諸法
本無生滅此名阿字陀羅尼門無自性無造作
無相貌無因緣無去來無衆生無壽者無養者
無補持伽羅無戲論無形狀無邊際無染汚無
餘習無使者無斷者無縛無解無進無退無勝
無劣無散亂無妄失無知無不知非見非不見
非戒非無戒非悔非離悔非喜非無喜非愛非
無愛非安非無安非定非無定非靜非無靜非

貪非離貪非脫非離脫非智非無智非作非無
作非報非無報大王若能入解此阿字門則能
入解一切諸法大王色離自性非已有非現有
非當有受想行識離彼自性三世不有亦復如
是大王譬如谷響非已有非現有非當有色乃
至識三世不有亦復如是大王譬如陽焰非已
有非現有非當有色乃至識三世不有亦復如
是大王譬如聚沫非已有非現有非當有色乃
至識三世不有亦復如是大王譬如石女夢已
生子非已有非現有非當有色乃至識三世不

有亦復如是大王虛空無依色乃至識亦無所
依大王色無有生乃至識亦無生大王色無有
滅乃至識亦無滅大王涅槃界無生滅色乃至
識亦無生滅大王法界無生滅色乃至識亦無
生滅大王此法乃是如來所行不可思議微妙
境界非取非捨非得非失非諸聲聞及辟支佛
凡夫異生之所能及何以故大王一切諸法本
無自性若取若捨皆不可得王於此法好自安
意正念觀察勿隨他教時淨飯王聞是說已明
了通達乃知無有少法可得不可得時此說名

佛說是法時淨飯王與七萬釋種各各獲得無
生法忍爾時世尊知淨飯王悟此法已深心決
定卽於口中放種種光遍照無量無邊世界超
過梵世復從如來頂門而入時尊者馬勝從座
而起偏袒右肩右膝著地合掌作禮以偈問佛
勇猛大聖尊 現此希有事 普放淨光明
遍照於梵世 一切智導師 何故現斯瑞
願說其因由 除我等疑惑 如來成道已
廣饒益衆生 爲度釋種故 令人天歡喜
如來放光明 覺悟諸佛子 如法而修行

當得無上智 佛爲三界主 最勝無與比

能破諸羣疑 清淨心安隱

爾時世尊爲馬勝比丘說伽陀曰

馬勝當諦聽 今放淨光明 爲利樂釋種

令見眞實智 彼等善了達 諸法不可得

於我正法中 寂靜心安住 釋種大名稱

了法無所依 得離彼疑心 未來當作佛

從此最後身 得生極樂國 於蓮花化生

奉觀無量壽 安住彼佛刹 精進無現轉

遊化於十方 承事俱胝佛 於一一世界

興種種供養 爲利諸有情 勤求無上道
經一一佛刹 建立諸佛事 如來所加持
勇悍心堅固 於無量億劫 嚴持妙香花
奉獻諸世尊 後當成正覺 於彼彼佛所
宣揚助法化 成熟諸有情 皆得心明悟
又彼諸佛土 無緣覺聲聞 唯有住大乘
清淨菩薩衆 一一佛壽量 無量俱胝歲
說化利衆生 緣盡如燈滅 彼佛滅度已
住持諸佛子 安住於世間 善宣空寂法
如是弟子衆 攝化諸衆生 調伏於自心

於空法得證 住不於逸行 觀法自性空
如理善修作 當成一切智 此諸釋種等
聞法悉開悟 諸天及世人 心生大欣慶
爾時世尊諸尊者舍利子我今說此見真實性
妙三摩地若諸菩薩聞是法已速能覺悟到於
彼岸何以故此三摩地明一切法自性非有無
補特伽羅無少法可得若有所得彼非覺悟若
無覺悟彼則無說若無說者則無了知若無了
知則是三世諸佛之法舍利子今我以此見真
實性三摩地門付囑於汝汝等應當受持讀誦

廣爲他說舍利子若善男子善女人安住大乘
於十劫中行五波羅蜜除般若波羅蜜若人於
此見真實性三摩地門親近聽受所得功德復
過於彼又舍利子若復有人於十劫中聞是法
已乃至能爲一人解說所得功德復過於彼又
舍利子若復有人於十劫中聞是法已爲他人
說不如有人於剎那頃修習觀察所得功德復
過於彼舍利子汝當一心爲諸菩薩分別開示
使不斷絕何以故若能證此三摩地者速能證
得無生法忍當得阿耨多羅三藐三菩提說是

法時尊者舍利子等諸比丘淨飯王等釋梵諸
天阿修羅乾闥婆人非人等聞佛所說皆大歡
喜信受奉行

父子合集經卷第二十

此經原刻二十卷內缺九、十一、至二十、共
十一卷今依大正藏補全